

Kalaallit Nunaanni piffissap suliffiusartup sapaatip akunneranut nalunaaquttap akunnerini 40-it sapaatip akunneranut nalunaaquttap akunnerinut 35-inut 37-inulluunniit appartinneqarnerata aningaasaqarnikkut, inuiaqatigiinnut peqqissutsimullu kingunerisassaanik misissueqqullugit Naalakkersuisut peqquneqarnissaannik Inatsisartut aaliangiiffigisassaattut siunnersuut. Misissuinerup inernera 1. januar 2027-iutinnagu Inatsisartunut agguanneqassaaq.

(Inatsisartuni ilaasortaq, Karen Marie Kyed Frederiksen, Demokraatit)

Akissuteqaat

(Isumaginninnermut, Suliffeqarnermut, Nunamut Namminermut Avatangiisinullu Naalakkersuisoq)

Siullermeerneqarnera

Qujanaq Inatsisartuni ilaasortaq Karen Marie Kyed Frederiksen, piffissaq sapaatip akunneranut nalinginnaasumik suliffiusartuq ullumikkut nalunaaquttap akunneri 40-niit 35-nut 37-nulluunniit appartinneqarpata, tamatuma aningaasatigut, inuiaqatigiinnut peqqissutsikkullu kingunerisassaanik misissueqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuuteqaravit.

2015-imi aamma 2017-imi Island sapaatip akunneranut sivikinnerusumik nalunaaquttap akunnerinik sulisarnermut tunngasumik misiliisimavoq, pisortani suliffeqartut inuit 2.500-t misiliutigineqarlutik. Islandimi ulloq naallugu sulisartunut inatsit imaappoq, sapaatip akunneranut nalunaaquttap akunneri 40-t suliffiussasut. Kattuffiilli ataasiakkaat isumaqatigiissutaanni itisilernerullugu nassuiarneqartarpoq, sulinerup sivilissusua qanoq aqqissuunneqassanersoq. Imaappoq sapaatip akunneranut sivikinnerusumik sulineq anguneqartarpoq Islandimi kattuffiit isumaqatiginninniarsinnaasut aqqutigalugit, inatsisitigunngitsoq.

CEPR-ip qitiusumik politikikkut aningaasaqarnikkullu ilisimatusarnermut ingerlatsivimmi, *“akunnernik sulinissanik annikilliliineq”* sammisamut pineqartumut ilisimatuut misissuiffigisaanni paasereersimaleraat, aqqissuusseqqinnerni misiliutitut sulisunut sulinerup piffissami annikilliisoqartoq takuneqarsinnaasoq, tamannali suliffeqarfiit nalunaaquttap akunnerinik ikinnerusunik sulisitsineq, sulisunik amerlanerusunik sulisussarsiornermi naleqqussaannikkut malitseqartinnngikkaat. Sulisut sulisussarsiornikkut ilaneqarsimanngikkaangata, sulisut taakku annertunerusumik suliaqalertarput, suliassanik naammassisassatut naatsorsuutigisat naammassiniarlugit.¹

2023-mi aamma 2024-mi Naalakkersuisut Suliffeqarnermut Nalunaarusiaat takutitsivoq, ukiuni tulluuttuni inuiaqatigiit agguataarnerisa ineriartornerata suliffeqarneq malunnaatilimmik sunnerumaaraa. Sulisussaaleqineq nalinginnaasumik pineqartillugu aamma inuiaqatigiinni utoqqaat amerleriarnissaat eqqarsaatigalugu. Suliamik naammassinnissinnaaneq ilaatigut utoqqarnut paaqqinniffinni sulisut amerlineqarnerisigut attatiinnarniarneqarsinnaavoq. Utoqqarnut paaqqinniffinni sulisut amerlineqarpata peqatigisaanik pisortani aningaasartuutit qaffakkumaarput. Taamaattumik kiffartuussinermi paaqqutarinninnermilu aningaasartuutit

¹ Tunngavik: [The employment effects of working time reductions in Europe | CEPR](#)

ilimanaatilimmik qaffannissaat eqqumaffigissallugu pingaaruteqarpoq, politikikkikut isummerfigineqarnissaanut torersumik tunngavissaqarluarnissaq pisariaqarmat.

Maani nunami suliffeqarneq ima iluseqarpoq, suliffeqarnermut illuatungeriit akornanni sulinerup sivisussusia isumaqatigiissutaasarluni. Tamanna inatsisitigut aalajangiussaangilaq. Taamaattumik pingaaruteqarluinnarpoq uani sammisami pingaaruteqartumi suliffeqarnermut illuatungeriit ilanngunneqarnissaat.

Suliffeqarnermi immikkoortuni arlalinni sulisussaaleqineq pioreersoq naluneqanngilaq. Nalunaaquttap akunneri suliffissat ikinnerusut sulisut amerlassusiat nikisinnagu, suliffeqarfiit suliamik naammassisaqarsinnaassusiata apparneranik kingunerisinnaavaa, pingaartumik amerlanerusut sulilinngippata. Tamatuma saniatigut sapaatip akunneranut sulisarneq 40 tiiminik ikinnerusut atuutilersinneqarpata, suliffeqarfinnut namminersortunut qanoq isumaqarumaarnersoq aamma naatsorsuisoqarnikuunngilaq.

Kisianni sapaatip akunneranut sulisarnerup 40 tiiminiit 35-nut imaluunniit 37-nut apparneqarpata, misissuinerup inernerata ersarissarsinnaammagu inuiaqatigiinni aningaasaqarniarnikkut peqqissutsimullu kingunerisinnaasai suunersut, Naalakkersuisut inassutigaa aningaasaqarnikkut, inuiaqatigiinnut peqqissutsimullu kingunerisassaannik misissuisoqarnissaa pillugu Naalakkersuisut peqquneqarnissaannik aalajangiiffigisassatut siunnersuut akuerineqassasoq.